

## Sultan Pahang ziarah waris mangsa tragedi treler rempuh rumah

Oleh [Asrol Awang](#) - Ogos 6, 2024 @ 11:42pm  
[bhnews@bh.com.my](mailto:bhnews@bh.com.my)



Al-Sultan meninjau keadaan rumah keluarga mangsa susulan sebuah treler merempuh rumah mereka di Kampung Ketapang Hilir, di Pekan, 3 Ogos lalu. - Foto ihsan Media Pahang

PEKAN: Sultan Pahang, Al-Sultan Abdullah Ri'ayatuddin Al-Mustafa Billah Shah, hari ini menziarahi keluarga dua beradik yang maut selepas sebuah treler merempuh rumah mereka di Kilometer 5, Jalan Pekan-Rompin dekat Kampung Ketapang Hilir, di sini, 3 Ogos lalu.

Baginda turut menyerahkan sumbangan kepada ibu bapa mangsa, Nasruddin Othman, 60, dan Norrulaini Mohd Hassan, 54, melalui anak sulung mereka, Mohd Fakhrol Hafis, 35.

Al-Sultan Abdullah turut meninjau keadaan rumah keluarga mangsa susulan kejadian terbabit.

Mohd Fakhrul berkata, Al-Sultan Abdullah menasihati keluarganya mengambil tindakan undang-undang terhadap pemandu lori dan syarikat pengangkutan terbabit.

"Baginda bertitah supaya kerosakan dibaiki semula dan bersimpati atas kehilangan dua ahli keluarga," katanya.



Kejadian lori treler merempuh rumah di Kampung Ketapang Hilir yang menyebabkan dua maut. - Foto NSTP

Dalam kejadian jam 4.15 pagi Sabtu lalu, treler membawa muatan siling kapur dari arah Johor Bahru menghala Kuantan dipercayai gagal dikawal di selekoh kiri lalu terbabas ke laluan bertentangan sebelum merempuh rumah berkenaan.

Kemalangan menyebabkan Nurnazatul Fasiha Nasruddin, 32, meninggal dunia di lokasi, manakala adiknya, Mohd Waldon Faris, 21, meninggal dunia ketika mendapatkan rawatan di Hospital Pekan.

Norrulaini dan Nasruddin serta rakan Mohd Waldon Faris, Muhammad Gabriel Miqhael Muhammad Faidzal, 19, yang turut berada dalam rumah, dilaporkan cedera.